

壬癸志稿二十三

太倉錢寶琛伯瑜輯

同里

葉裕仁涵溪  
季錫疇崧耘  
趙兆熊耳山  
畢庭杰雄伯

參校

人物

鎮洋縣

宦績

國朝

陸燦字澗文家貧力學有志行乾隆十年進士授博白知縣有監生某姦殺僕婦尸棄於江燦訪得實一訊而服朱謝二姓爭田訟踰四十年燦為直之陸川民陳某

壬癸志稿

鎮洋 宦績

一

利孀嫂產致嫂自盡會知縣他出燦代驗母叔誣以姦燦疑之密偵其冤按如法又修書院葺縣倉多惠政在任四年以疾卒喪歸民哭送百里

周模字受全廣後世居鶴市入貲為順天府糧馬通判五城經紀多積猾模廉得之悉力懲禁攝治中兼大興篆所至有稱秩滿遷戶部員外假歸卒子瑛字彩符亦以貲授順天府通判擢刑部員外郎假歸里居會挑濬七浦力任其事桑梓利之年五十一卒

王文徵字士芳乾隆十七年進士歷任從化興甯新安海陽知縣陞同知分校鄉闈稱得士母老乞養歸病卒

在從化創立書院海陽俗悍時搆大獄文徵嚴治首犯  
省株連又創建育嬰堂置義塚多惠政子淦乾隆四十  
二年舉人由廣東知縣陞澳門同知卒

王璞字振采副貢生選沛縣教諭值沛災辦賑吏胥不  
得舞弊蝻孽間發竭力驅捕蝻不爲患授徒講學亦井  
井有法

彭禮字行之榜姓吳乾隆三十一年進士授甯武知縣  
俗鄙儻少文禮擇秀良者教之使各訓於其鄉士始知  
學村婦以姦殺其夫詭報自縊禮廉得之論如律有毆  
傷其父者立杖殺以示眾然後報聞上官才其斷弗罪

### 壬癸志稿

鎮洋 宦績

二

也巡撫農起將薦之會起卒不果以年老乞休既歸貧  
乏不能自存因復就潁州府教授四年而卒初禮就選  
時寓都下取史中循吏傳錄之或謂古今時勢異宜禮  
曰變者其跡不變者其道神而明之安在不如古人乎  
子兆蓀別有傳

王琯字孚達副貢生由正定通判陞大名同知經理滹  
沱河工程疏洩有方漳河水發晝夜防護居民安堵

趙大漉字瀛洲乾隆四十三年進士歷任淄川禹城等  
縣以事罣誤開復後授昌樂縣居官盡職勤政愛民以  
疾卒於任

黃錫寶字庶徵嘉慶十三年進士出知甘肅伏羌縣擢知河州調廣東化州所至採輯志乘振興人文邊氓嚮風

陸模字哲士嘉慶二十一年舉人知浙江金華縣甫下車卽平反數案以明恕稱調錢塘勤於政晨出行縣於輿右懸置一牌遇投牒卽案問令隨吏繕錄供狀歸而以次判決無畱者擢補台州同知厯署湖州杭州知府湖州匪徒嘯聚爲亂官兵至則竄伏模蹤跡之遂獲其魁置諸法會暎夷擾事前後數載籌畫軍需事皆濟以勞陞廣西南甯府因辦善後未赴

壬癸志稿

鎮洋 宦績

三

今上登極入都謁選會病卒模遇事勇幹居鄉時亦多所贊畫平生好爲詩歌雖處倥傯未嘗一口廢也

葉自莊字肅廷道光元年舉人授湯陰知縣性仁厚讞獄平恕教士有則岳武穆裔孫名開圖者貧甚自莊特周卹之葬其三世之喪丁憂服闋謁選得黃梅縣未抵任卒於京

壬癸志稿二十三終